



17 gusht 2012, Prizren

KOMUNIKATË PËR MEDIA

Mbi 18.000 euro për udhëtime zyrtare

EC Ma Ndryshe edhe gjatë muajit gusht ka vazhduar me monitorimin e punës së ekzekutivit komunal të komunës së Prizrenit. Gjatë kësaj periudhe në fokus të monitorimit kanë qenë konkluzionet e kryetarit të Komunës. Një dimension mjaft shqetësues i konkluzioneve të kryetarit është mënyra e shpenzimit të parasë publike për udhëtimet e zyrtarëve të komunës së Prizrenit. Brenda shtatë muajve të vitit 2012, nga buxheti i komunës janë shpenzuar mbi 18.000 euro për udhëtime zyrtare. Bashkëngjitur në këtë komunikatë, do të gjeni listën e shpenzimeve për udhëtime zyrtare prej 1 janarit 2012 deri më sot.

Në takimin e kryetarit të Komunës me drejtorë të drejtorive komunale të datës 24 prill 2012, kryetari miraton konkluzionin që lejon udhëtimin zyrtar dhe pagesën e mëditjeve për Ramadan Mujën (kryetar i Komunës), Njazi Kryeziu (kryesues i KK-së), Orhan Lopar (nënkryetar i KK-së), Minir Krasniqi (drejtor i Administratës), Hasan Hasanin (drejtor i Shërbimeve Publike), Afrim Gashin dhe Sadik Gashin (nëpunës civil të Komunës) me qëllim të pjesëmarrjes në Festivalin V Ndërkombëtar të Valleve për Fëmijë, të mbajtur më 19 – 23 prill 2012 në Bejkozi të Republikës së Turqisë. Duke u bazuar në tarifën për mëditje të udhëtimit jashtë vendit, këta zyrtarë kanë shpenzuar shumë prej mbi 2000 eurove si dhe biletat e udhëtimit në shumë prej 916 euro. Në këtë rast, shuma rreth 3000 eurosh është shpenzuar nga buxheti i Komunës për pjesëmarrje të shtatë zyrtarëve komunalë në një festival vallesh për fëmijë.

EC Ma Ndryshe konsideron që shpenzimi i parasë publike në këtë mënyrë është veprim i paarsyeshëm dhe i pamoralshëm. Shkuarja e njerëzve kyç të qeverisë lokale në këtë festival vallesh për fëmijë në Turqi, është dëshmia më e mirë për shëtitjet e shumta të zyrtarëve komunalë jashtë vendit, një pjesë e të cilave nuk lidhet as me interesat e qytetarëve të Prizrenit e as me ato të qeverisë lokale. Në një tjetër rast, kryetari i Komunës, më 18 prill 2012 ka miratuar konkluzionin për lejimin e ekskursionit/vizitës katër ditore për nëpunësit civil të Komunës së Prizrenit në Republikën e Shqipërisë për nder të Ditës Ndërkombëtare të Punës (1 Maj). Realizimi i këtij ekskursioni, buxhetit të Komunës i ka kushtuar 5.624 euro.

EC Ma Ndryshe i bën thirrje kryetarit të Komunës së Prizrenit që të jetë i kujdesshëm në shpenzimin e parasë publike në kategoritë paga e mëditje dhe mallra e shërbime. Kryetari i komunës ka obligim ligjor dhe moral që të menaxhojë me përgjegjësi paratë e taksapaguesve të Prizrenit. Udhëtimet e zyrtarëve të komunës, që vetëm për shtatë muajt e parë të vitit 2012 kapin shumë mbi 18.000 euro, paguhen nga paratë publike, respektivisht nga taksat e qytetarëve të Prizrenit. Prandaj, në marrjen e vendimeve për shpenzimet e udhëtimeve zyrtare, kryetari i Komunës duhet t'i ketë parasysh standardet e qeverisjes së mirë dhe të menaxhimit adekuat me paratë publike. Në të njëjtën kohë, kryetari duhet të ketë parasysh se menaxhon me buxhetin e një komune me nivel mjaft të dobët të zhvillimit ekonomik dhe me tregues alarmant të niveleve të varfërisë (dhe varfërisë ekstreme), papunësisë dhe rasteve sociale.

Projekti i EC Ma Ndryshe për monitorimin e transparencës së ekzekutivit do të vazhdojë të publikojë të gjeturat e monitorimit përmes komunikatave të rregullta dhe prej muajit vijues përmes web-faqes së projektit, ku të gjeturat do të postohen drejtpërdrejtë nga monitoruesit. Tanimë të

gjitha të gjeturat e monitorimit, përfshi komunikatat e rregullta dhe shumë informacione të tjera në lidhje me qeverinë lokale të Prizrenit publikohen në baza të rregullta në web-faqen e projektit, www.online-transparency.org.

Ju falemnderit për bashkëpunimin tuaj,

Hajrulla Çeku, drejtor ekzekutiv
OJQ EC Ma Ndryshe
Rr. Ismet J. Kumanova, Nr. 31 - Prizren
Rr. Zeki Shulemaja, Nr. 2 - Prishtinë
www.ecmandryshe.org & info@ecmandryshe.org
+381 38 522 199 & +386 49 116 448

Projekti "Transparenca on-line e komunës së Prizrenit" mbështetet financiarisht nga Fondacioni i Kosovës për Shoqëri të Hapur

SOROS

Fondacioni i Kosovës për Shoqëri të Hapur
Kosovo Foundation for Open Society
Kosovska Fondacija za Otvoreno Društvo